

A C T I T U D E S

AYERE, UYEY

POR ANCHEL CONTE

*Nieva... Ye l' hora calma
dimpuesas de chantare.
M'asomo per a ventana
y veigo cayer a niéu, tan mansa,
que me da un "que misi'ó" de paz...
No bi-n'ha de chen n'as carreras
y tó esdeviene blanco.
Dan ganas
de chita-se n'ixe lienzuelo
—¡de güen implaz o farí!—
qu'amolla y sotova la tierra
y allarga
o día...
o fa tornare atro.
Yo estoi aquí, caliéñ, pensando
qu'a vida sigue
y que cuasi n'he perdíu
o camín d'era.
Cal que corra si quiero
enanta-la atra vegada...
Pero ya me vagará.*

*Agora veigo y me siento
renaxer,
com'ixa tierra qu'apara
la niéu sin tremolare
porque sabe qu'a fecunda...
En fan de bien ixa paz y ixe silencio,
luen de tóz...
A ormino, o chelo ye menos frío
qu'o silencio d'a chen
que redola...
Pero agora nieva n'ixa hora calma
dimpuesas de chantare
y ye fácil senti-se renaxer.*

*Agora puedo sentir a plevida
que cay tovamién contra
o telláu
y ruxa os cristals.
A veigo contra o farol
d'a esquina...
Ye manso ixe momento.
Ye manso porque deixo
de pensar que dellá d'ixa ventana
ye atro mundo.
Puedo sentir,
chunto con l'augua,
l'amargor d'una soledá nunca emplida.
Pero ixo poco me se da agora,
cuan o mundo me se fa chicorrón.
No ye a paz,
no ye l'equilibrio buscáu...
Ye un bueito total
acompasáu por una música repetida...
Y luen, luen d'ista plevida,
atras tierras y atras chens
que piensan en yo...*

*Pero me fa mal o suyo ricuerdo
y lo me secuto ta no sentir atra cosa
qu'os trucazos d'o mio corazón
à o mesmo compás
que l'augua que salpica o telláu.*

*I-se-ne, i-se-ne astí an o mundo
no tienga lindes
y tó s'esbate entre cosas sin chens.
Puyare à un abre y vier
qu'a vida muere'n cada paso.
Esbrizna-se'n boiras
que no valen ni ta plever.
Reveni-se n'a escureldá
y fer d'o dia la nuey.
No saber an ye a verdá
y an a mentira...
y estar feliz con ixa incerteza,
u no estar feliz, pero deixare de sufrir...
I-se-ne ta no i-tornare más
astí an o presén seiga una presencia...
Amare ende luen,
como cualquecosa que s'esborra
y fa allargare as mans
sin alcontrare cosa.
I-se-ne: morir sabendo que tó,
as chens y as cosas, son una taca... aceta,
pero sólo qu'una taca.
I-se-ne libre ta siempre.
I-se-ne crebando l'aire.
I-se-ne y deixare tó de zaga.*

*Tóz l'hez sentiu vella vegada
igual como yo agora,
igual como yo
ende que tenebe l'esmo
d'o zagal que crexe con a piel crebazada
y as mans prestas ta tastare o mundo...
Tóz hez sabiu o que ye ixe miedo.
Ixe miedo à que vel dia,
sin parare cuenta,
a cleta que redola la libertá s'escache
y deixe paso libre...
Ixe miedo à qu'a tuya vida,
vida qu'has feita y has defendida,
seiga herencio sin esdevenidero...
Asina soi agora:
tremolando de vie-me espulláu.
Y tos o digo, sabéz, con ixe miedo
que te ixuga o cuerpo,
que te deja la pelleta reseca,
porque a sudor denuncia...
que te ixuga os güellos,
porque as lacrimas son peligrosas...
que te deja la boca enxuta,
porque as parabras son tamién peligrosas.
Pero anque yo agora sólo seiga qu'un cuerpo,
puedo icir, quasi con orgullo,
que vivo y tiengo miedo.*

*Cuan tóz seigáz salíus à o mio paso con o puño entalto
y o riso mego n'a boca...*

*Cuan haigáz crebáu ta siempre o mio mundo chicorrón
qu'hebe feito sin asperanzas d'escachar fronteras...*

*Cuan tóz seigáz cara ta yo
con a certeza de conexe-me...*

*Cuan o miedo no esista
y yo haiga trafegáu a seguridá qu'enantis m'hébaz dada,*

rancaré a fuella

zaguera

y m'en iré

à chitare

as simiéns

asti

an naide

m'aguarde.